

历代浑源神川诗文 北岳恒山诗文(2)

恒源合作社为您提供 塞北北岳恒山浑源特产绿色产品 [浑源名产黄芪](#) [北芪菇](#) 特产
杂粮 [浑源凉粉](#) [大豆](#) [莜面](#) [豆面](#) [土豆粉面](#) [黄糕面](#) [小米](#) [杏仁](#) [各类野山食品](#) 健康生活养生 自用或
送礼 均为上品 恒源鸡蛋, 本地饲养, 质优价平, 保证新鲜. 恒源合作社 山西浑源永安镇西顺(邮编 037400) 产品咨询或订购 电
话 手机 138352-04828 电邮 hengyuan@northgreatwall.com 恒源网址 www.hengyuan.northgreatwall.com 本地城内送货上门 外地邮购网
上订购

历代

浑源神川诗文 北岳恒山诗文

(二)宋 金 元朝(上) 元好问

翠屏峰 编辑

北岳

作者:金朝·元好问

太茂维岳古帝孙，大朴未散真巧存。乾坤自有灵境在，地位岂合他山尊。
中原旌旗白日暗，上阶楼观苍烟屯。谁能借我两黄鹄，长袖一拂玄都门？

过翠屏口

作者:金朝·元好问

鬓髯苍白葛衣宽，事外闲身也属官。授简如闻数枚叔，乘车初不少冯欢。沙城雨塌名空在，
石峡风来夏亦寒。两饱三饥已旬日，虚劳儿女劝加餐。

念奴娇 饮浑源岳神仙会

作者:金朝·元好问

小山招饮，恨还丹、不至人间豪杰。南渡衣冠多励集，萧洒兰亭三月。陶冶襟灵，留连光景，觴咏今无复。黄垆虽近，老怀空感存歿。谁办八表神游，古来登览，此日俱湮没。天景云光摇醉眼，兴在珠宫瑶阙。布席崧台，脱巾石壁，散我萧萧发。短歌悲慨，海涛响振林樾。

归潜堂

作者：金朝·元好问

南山老桂几枝分？翰墨风流属两君。共说人间好畝向，争教茅屋著机云。备尝险阻聊乘化，力战纷华又策勋。却恐声光埋不得，皇天久矣付斯文。

归潜堂访刘京叔

作者：金朝·元好问

尘土悠悠浣客簷(水旁)，一堂千古入幽潜。喧无车马云迎户，静有琴书月挂椽。浑水清冷通竹过，南山苍翠与天兼。遥知吟啸同云弟，剩有新诗酒壁缣。

浑源望湖川见百叶杏花二首

作者：金朝·元好问

其一

四月山泉冻未开，东君才为挽春回。多情丹杏知人意，留著双华待我来。

其二

儿时忆向西溪庙，丹杏曾看百叶花。今日山中见双朵，自怜憔悴老天涯。

【原注】陵川西溪二仙庙有百叶杏前。

横山寺

作者：金朝·元好问

浮图百尺耸亭亭，落日鸦啼野蔓青。故国尽消龙虎气，横山犹带凤凰形。
金根辇路迎禅驾，玉树歌台语梵林。惟有滹沱河上月，年年随雁过寒汀。

雁门关外

作者：金朝·元好问

四海于今正一家，生民何处不桑麻。重关独居千寻岭，深夏犹飞六出花。
云暗白杨连马邑，天围青冢渺龙沙。凭高吊古情无尽，空对西风数去鸦。

雁门关外（民谣）

作者：不详

雁门关外野人家，不种桑榆不种麻。百里并无梨桃树，三村哪得桃杏花。
六月雨过山头雪，狂风遍地起黄沙。说与江南人不信，早穿皮袄午穿纱。

赠玉峰魏丈邦彦

作者：金朝·元好问

梦想南山掩霭间，眼明惊见玉峰寒。风波旧忆横身过，世事今归袖手看。
贩妇佣儿识名姓，故乡遗俗见衣冠。临流卜筑平生事，会就辽东管幼安。

过皋州寄聂侯

作者：金朝·元好问

涧冈重复并湍流，斜日黄榆岭上头。地底宝符临赵国，眼中佛屋见皋州。
云沙浩浩雁良苦，木叶萧萧风自秋。别后故人应念我，一诗聊与话离忧。

赠冯内翰二首 并序

作者:金朝·元好问

内翰冯公，往在京师日，浑源雷渊希颜、太原王渥仲泽、河中李献能钦叔、龙山冀禹锡京甫，皆从之问学，某夤缘亦得俎豆于门下士之末。然自辛卯、壬辰以来，不三四年，而五人者惟不肖在耳。丙申夏六月，公自东平将展墓于镇阳，以某在冠氏，枉驾见过。时公方为髀股所苦，吟呻展转，若非老人之所能堪。然间语及旧事，则危坐终日，往往为之色扬而神跃，以公初挂冠归嵩山时校之，其谈笑风流固未减也。窃意造物者锡公难老，使后生辈望见眉宇，以知百年文章鉅公，敦庞耆艾之士，褒衣博带，坐镇雅俗者盖如此。横流方靡，而砥柱不移；故国已非，而乔木犹在。幸公之可恃，而哀四子之不见也，作诗二章，以道区区之怀。于公之行，而为之献。

耆旧如公可得亲，争教晚节傍风尘？青毡持去故家尽，白帽归来时事新。扶路不妨驴失脚，守关尤觉虎憎人。只应有似松庵日，时醉中山麴米春。

龙门冠盖日追随，四客翩翩最受知。桃李已随风雨尽，柏松独与雪霜宜。元龟华发渠有几，清庙朱弦谁与期？见说常山可归隐，从公未觉十年迟。

发南楼度雁门关二首

作者:金朝·元好问

其一

鸡声未动发南楼，涧水随人向北流。欲望读书山远近，雁门关上懒回头。

其二

棱磳石磴倚高梯，穹谷无人绿树齐。总为古来征戍苦，宿云常傍塞垣低。

跋文献公张果老图

作者:金朝·元好问

耆旧能谈相国贤，功名欲占冷岩前。清风万古犹应在，未用仙公甲子年。

岳山道中

作者:金朝·元好问

野禾成穗石田黄，山木无风雨气凉。流水平冈尽堪画，数家村落更斜阳。

十月二十日雪中过石岭关

作者:金朝·元好问

老天黯惨入平芜，朔吹崩奔万窍呼。雪意旋妆行路景，诗家新有入关图。
地炉围坐惭田父，絮帽冲寒怨仆夫。故国烟花重回首，蜀橙山麝记金壶。

石岭关书所见

作者:金朝·元好问

轧轧旃车转石槽，故关犹复戍弓刀。连营突骑红尘暗，微服行人细路高。
已化虫沙休自叹，厌逢豺虎欲安逃。青云玉立三千丈，元只东山意气豪。

十三日度岳岭

作者:金朝·元好问

神岳规模亦壮哉，上阶绝境重裴回。丹青万木秋风老，金翠千峰落照开。
川路渐分犹暗淡，湍声已远更凄哀。石门剩比灵丘远，正坐登临欠一来。

玉泉二首

作者:金朝·元好问

其一

神岳提封入寺基，上公官秩见僧碑。云藏佛屋晴犹暗，树近禅窗老更奇。
行杖只供行险易，藜床偏与望川宜。同时不及髯中令，犹得泉名比凤池。

其二

玉水泓澄古殿隅，又新名第不关渠。每因天日流金际，更忆风雷裂石初。
百里官壶分韵胜，千人斋粥荐甘余。八功德具体夸好，玩景台荒有破除。

【原注】寺东北有玩景台，尽得神川之胜，导者误引之荒山，一笑，故有二句。

李峪园亭看雨

作者：金朝·元好问

龙山右肋松十里，细路蜿蜒绕龙尾。松林迫塞闷煞渠，北望玉泉疑井底。
玉泉元自别一天，眼界廓廓无神川。金城百里才一俯，半尖浮图插苍烟。
行行下绝栢，招提忽当眼，未到倦不胜，小憩遂忘返。玉泉一杯甘以冽，
未须张陆夸冰雪。主人不在客不留，烈风崖下风飏飏。石头路滑马蹄怯，
山雨未落云先愁。将军林园永安下，秋霁村墟绝潇洒。浓云压屋风打头，
仅得羈御脱疲马。只知龙山之神神更神，永安亦能撼诗人。晦冥变化千
万态，画出风雨元非真。山灵亦愁归后夜，半面时时见云罅。天瓢细洒
供晚凉，不似草堂回俗驾。层阴一扫群峰出，一洗深青彻山骨。夕阳展
放紫翠屏，只欠松梢一轮月。山中一石回万牛，况是一壑复一丘。不如
一诗招将入南州，先生兴来时卧游。

游龙山

作者：金朝·元好问

曩予魏大梁，得交此州雷与刘。自闻两公夸南山，每恨南海北海风马牛。
老龙面目今日始一见，更信造物工雕锼。是时山雨晴，平田绿油油。并
山凉气多，况得通深幽。山泉谷口出迎客，石罅戛击琳琅球。蜿蜒入微
行，渐觉藤萝冒衣树打头。恶木拉飒栖，直干比指稠。石门无风白日
静，自是林响寒飕飕。一峰忽当眼，仰看看不休。一峰一峰千百峰，虽
欲一一顾揖知无由。金城偃蹇不得上，瑶壑回合如相留。苔花万锦石，
丹碧烂不收。天关守虎豹，武库开戈矛。小山随起随偃仆，独立千仞绝
顶缥缈之飞楼。百花冈头藉草坐，潇洒正直金莲秋。亭亭妙高台，玉斧
何年修？登高览元化，快如鹰脱鞴。山灵故为作开阖，巧与诗境供冥
搜。白云何许来？纤丝弄轻柔。蓬莱作雾涌，飘飘与烟浮。玉衣仙人鞭
素虬，翕忽变化令人愁。须臾视六合，浩荡不可求。初疑陶轮比运甓，
今悟夜壑真藏舟。劫石拂未穷，杞国浪自忧。断鳌立极万万古，争遣起
灭如浮沤。快哉万里风，一扫天四周。谁言太始再开辟，日驭本自无停
辀。举手谢山灵，就无清凉毫相非神羞。贱子贪名山，客刺已屡投。黄
华挂镜台，天坛避秦沟。太山神明观，二室汗漫游。胸中隐然复有此大
物，便可挥斥八极隘九州。玉峰有佳招，绝唱须一酬。为君探囊掷下珊
瑚钩，白云相望空悠悠。异时华表见老鹤，姓字莫忘元丹丘。

雁门道中书所见

作者：金朝·元好问

金城留旬浹，兀兀醉歌舞。出门览民风，惨惨愁肺腑。
去年夏秋旱，七月黍穉吐。一昔营幕来，天明但平土。
调度急星火，逋负迫捶楚。网罗方高悬，乐国果何所。
食禾有百觜，择肉非一虎。呼天天不闻，感讽复何补。
单衣者谁子，贩黍就南府。倾身营一饱，岂乐远服贾。
盘盘雁门道，云涧深以阻。半岭逢驱车，人牛一何苦。

金城留旬浹，兀兀醉歌舞。

岳祠斋宫夜宿

作者:金朝·元好问

煌煌德宁宫，望秩年祀永。唐来几焚荡，規制仍峻整。
龙旂严黼座，金罍散光炯。岳拜行且周，伟观窃欣幸。
青红留坏壁，兵卫自驰骋。木杪见龟趺，雄笔映钟鼎。
中和昔丧乱，已溺宁再拯。有来雁门公，赤手探虎鯁。
经营入惨淡，洒落出锋颖。凶竖竟自摧，神鉴益彪炳。
青山阅人代，今古一炊顷。摩挲盘根槐，甲子谁记省？
謁来石门道，烟岫接云岭。霄汉瞻上阶，浓碧插秋影。
青林雨声集，悬瀑激奔猛。森然心魄动，冰雪凄以耿。
飘飘想仙袂，飞下玉莲井。昨梦知是非，复此造真境。
妙香净余习，灏气发新警。鹤书来何迟，素发迫垂领。
玄坛展衰步，似欲逐幽屏。高柯月纷纷，裴回惜清景。

题刘紫微《尧民野醉图》

作者:金朝·元好问

苍苔浊酒同歌呼，白鬚红颊醉相扶。尧时皇质未全散，不论朝野皆欢虞。
望云云非云，就日日非日。先秦迂儒强解事，极口誉尧初未识。尧民与
酒同一天，此外更谁为帝力。仙老曾经甲子年，戏将陈迹画中传。山川
淳朴忽当眼，回望康衢一慨然。不见只今汾水上，田翁鞭背出租钱。

【原注】尧甲子年，仙人张果事。

玄都观桃花

作者:金朝·元好问

前度刘郎复阮郎，玄都观里醉红芳。非关小雨能留客，自是桃花要洗妆。
人世难逢开口笑，老夫聊发少年狂。一杯尽吸东风了，明日新诗满晋阳。

塞北网浑源网页 www.hunyuans.northgreatwall.com 致力于弘扬塞外名城浑源北岳恒山文化, 建立让世界了解浑源和浑源了解世界的窗口, 为浑源特产提供走向世界的平台, 为各地人士选购和享用塞北浑源北岳恒山健康特产食品提供优质服务.

Copyrights by 塞北网(www.northgreatwall.com), All rights reserved. 版权所有, 免费下载仅供个人阅读使用, 不能用作商业和其它用途. 若欲用作商业和其它用途, 请联系塞北网浑源网页(www.hunyuans.northgreatwall.com).